

四庫全書

集部

欽定四庫全書

集部

五百家播芳大全文粹卷一
中下

詳校官編修臣謝振定

助教臣常循覆勘

總校官編修臣王燕緒

校對官中書臣范 鏊

謄錄監生臣張若湘

欽定四庫全書

五百家播芳大全文粹卷一中

宋 魏齊賢

葉 蔡同輯

賀表

誕皇子

賀誕皇子表

晁之道

德符宮昊慶集宮闈篤生岐嶷之姿來會明昌之運照

臨所逮鼓舞攸同 中賀 竊以固有永之基莫先主器紹
無疆之服蓋本承天下以宅萬國之懽心上以豫兩宮
之愜志顧茲大慶允屬熙辰此蓋皇帝陛下德動幽明
仁均動植合天心而克享祇帝事以靈承神罔怨恫物
無違拒是以三靈薦祉九廟儲休克綏龜筮之祥爰發
熊羆之夢是生粹質作我元良臣待罪西陲馳心北闕
上千萬歲之壽阻陪漢殿之班詠百斯男之詩載效華封
之祝

賀誕皇子表

李成季

太史觀天已識前星之應大人占夢果符男子之祥喜

溢宮闈慶均海宇

中賀

竊以誕彌吉月有開后稷之先

則百斯男於顯文王之盛由人神之相與荷福祿之無

窮恭惟皇帝陛下孝安祖宗仁遂動植疏爵賞以繼功

臣之世發廩庾以惠天民之窮廣大德以好生示神武

之不殺萬事咸理允格丕平四夷皆來實獲多助三辰

昭鑒六聖具依載錫洪休篤生元嗣至誠能動無符薦

高祿之薌流澤有源何煩種北宇之竹况乃岱祇見象
渦聖呈光共扶萬世之基來兆一人之慶岐嶷之性先
自得於神靈聰明之資將弗煩於師傅大木有系衆情
以熙臣猥服外僚親逢盛事上南山之壽阻預班聯誦
螽斯之章莫知鼓舞

賀誕皇子表

宋侍郎

寶佑叢林天支毓秀慶騰秘禁歡溢中區中賀恭惟尊
號皇帝陛下受命溥將凝圖丕赫權綱用義根乎克念

之虔簡素所安表於不勉之懿且復欽刑薄賦重穀弛
畋一方少饑則佇馳使節萬金稍乏則輒續禁錢民用
靖嘉神罔怨恫是以上帝歆佑三后顧存貽美孫謀昭
衍無疆之烈歸功元首茂啟多男之祥誕協仲商挺生
哲嗣星弧具禮棠棣文華惟翕闢之儲英固覃訃而絕
異逖聆詔諭並仰獻儀薦笏相趨抃吾君之有子珪璋
流慶宜天下之繫心臣始去近聯遽承吉語賡歌緜疇
早知周德之遐參祝祠謀罔罄漢臣之幸臣限守符印

不獲奔詣闕庭臣無任瞻天樂聖企竦歡呼之至

賀誕皇子表

王介甫

宮闈嗣慶寰海交忻凡逮戴天惟均擊壤中賀臣聞螽斯之言衆子實為王者之詩華封之祝多男亦曰聖人
之事恭惟皇帝陛下紹祖休顯憲天昭明致文武之憂
勤成堯舜之仁孝宅師無競堯章之寢既安傳類有祥
弓蠲之祠屢應詒謀方永錫美用光臣託備藩維叨承
眷獎不顯亦世家實預於榮懷於萬斯年心敢忘於慶

頌

賀誕皇子表

唐子西

前星騰耀麗日重光凡在照臨舉傾瞻仰中賀臣竊以
漢室之尊冢嗣遂立高禘堯封之祝聖人俾多男子蓋
承祧之至重任主器以非輕恭惟皇帝陛下駿惠先猷
作新聖治奉天以敬恪勤父事之心養物以慈摩撫子
來之俗蓂莢被澤行葦露仁穹昊駢禧元良毓秀為社
稷久長之慶承祖宗積累之休遣使告陵重離明之有

繼飛郵賜詔達解雨以無垠臣承之遠方欣聞吉語震
雷虩虩知七帑之克堪螽羽詵詵期子孫之寢盛

賀誕皇子表

王介甫

燕謀享德方儲錫羨之祥熊夢生賢克協會昌之運預
在照臨之廣敷同慶賴之深中賀竊以思齊神罔時恫
假樂民之攸暨天所保佑厥惟太似之多男國之榮懷
亦曰成王之衆子恭惟皇帝陛下令德光乎洛誦康功
茂乎岐昌鴻休無疆景命有僕蓋芣苢之薄言采采衆

樂先成則螽斯之宜爾振振宗強孰御臣久叨眷遇適
阻進趨親值本支百世之盛時敢忘萬年壽考之善祝

賀誕皇子表

王介甫

嘉慶係傳歡欣總集臣中賀臣歷觀古昔誕受福祥厥
配天所以久長乃有子至於千億伏惟皇帝陛下鳧鷖
之雅媚於神祇芣苢之風燕及黎庶乃蠲嗣燕禘之報
旒旗仍熊夢之祥無疆惟休永保苞桑之固有室大競
方觀椒實之繁臣嘗汙近司久尸榮祿特荷殊憐之至

豈勝切燾之深臣無任

賀誕皇子表

王介甫

本支浸衍實為萬世之休遐邇同欣胥賴一人之慶中
賀臣聞王懋厥德則后妃無嫉妬之心天錫之祺則子
孫有衆多之美蕃釐有繼垂祐無窮伏惟皇帝陛下躬
睿智之資撫休明之運教由內始正自身先治既格於
人和誠遂膺於帝祉乃占我夢實多考室之祥則百斯
男克紹刑家之慶臣叨榮特厚切抃尤深雖接武縉紳

莫預造庭之列而瞻威咫尺唯傾就日之誠

賀誕皇嫡孫表

沈清臣

鴻圖錫羨卜年過蒼籙之期未邛發祥奕葉啟綠車之慶事關廟社喜極神人中賀恭惟皇帝陛下襲積累之休撫靈長之運惟邦國之盛事曠古昔以希聞尊拱帝堯揖遜相傳於帝舜德隆文子繼承又見於文孫兩宮之弟祿朋來四世之嘉祥坐閱臣濫叨分委獲覩榮懷光動尾躔灼見天心之默佑歡形足躡不勝臣子之至

情

建儲

賀立皇太子表

晁之道

誕揚休命肇建儲闈上當天心下愜人意照臨所逮鼓
舞攸同中賀竊以自昔熙朝必先元嗣謹承天之序所
以示百王之公嚴問寢之經所以教四海之養舉茲盛
典屬在昌辰恭惟皇帝陛下降陟在天憲章復古治效
光乎簡冊德馨達於昊穹周格眷懷備膺報貺錫多男

之丕應既已彰帝命之符隆主器之上儀又將固天下
之本惟聖心之獨得致海宇之均休臣積受國恩久塵
法從仰前王之丕煥愈知北極之尊振喬嶽以歡呼永
祝南山之壽臣無任

賀立皇太子表

曾文肅

元良定位正統宅安大協三靈之和仰增七廟之重
中
賀竊惟順天心而與子由三代之公貳宸極以升儲則
萬邦以正發聖謀之獨見定炎歷之重熙慶號所孚羣

生有繫恭惟尊號皇帝陛下本湯迪哲體舜用中禮樂
政刑邁百王之風采孝仁聰睿迪四聖之神明謂寶命
之重而謹於承祧謂天下之大而先於正本長子在震
宜主鬯之所符大人於離斯重明而有繼發前星之象
緯基萬世之本支臣假守侯藩阻趨天闕

賀立皇太子表代

汪彥章

仰法前星肇開儲禁慶闕宗社禮絕臣隣恭惟皇太子
殿下胄出神明生知忠孝夙稟刑家之訓居無在傅之

勤震一索而得男早膺眷命月三讓而成魄難徇搗謙
兼隆監撫之名進極褒嘉之數載錫雕珉之冊爰頒青
輅之旂某幸托宗暉欽承友順盛典方昭於宮壺觀成
敢後於簪纓

賀立皇太子表代

汪彥章

肇啟震維丕承天緒立賢以嫡吉先見於蒼龜移孝而
忠勢益隆於堂陛恭惟皇太子殿下溫仁秉質純茂凝
資首符甲觀之祥早悟南陽之牘屢錫真王之爵悉傳

外傳之經涓選休辰進居儲貳異宮增秩稽至道之典
儀奉鬯承祠見裕陵之孫子某幸聯近屬親睹殊休望
鶴禁之聲嚴阻鷓行之進謁

賀立皇太子表

汪彥章

發冊於中升儲以嫡遂正少陽之位永符太極之尊恭
惟皇太子殿下稟德星暉凝姿玉裕鍾朱芾宜家之慶
膺青宮主器之祥左右前後皆正人既懋分坊之選干
戈羽籥在東序行觀齒冑之儀某幸際聖時親逢邦慶

喜人倫之既正符天下之至公

賀立皇太子表

王禹偁

禮崇儲副澤被華夷凡在含生罔不同慶臣聞帝王之
道步驟殊途夏后所以傳家垂諸古典姬昌之為世子
載於禮經皆所以定人心而固國本矣由三代而下寶
百王不刊洎乎唐室豆分梁朝草創莊宗則席未遑暖
明宗則日不暇給聯綿五姓戰伐百年重念春坊遂成
闕典我太祖神德皇帝揖讓神器司牧黎元擇上聖之

才副下民之望人神允屬謳訟攸歸伏惟至尊號皇帝
陛下傳自日兄升為天子德化威伏垂二十年文物聲
名盡合經義禮樂征伐不自諸侯始求主鬯之親用正
副君之位斯孟軻所謂天與賢則與賢天與子則與子
者也伏以皇太子生知忠孝性稟溫文允符當璧之祥
宜正撫君之重筮龜叶吉簡冊增輝而又舉洊雷之聲
因而作解導少海之潤用以滌瑕必由舊章降此大賚
綸綍四出徃牢一空率土普天不勝慶幸臣出官禁署

承乏方州目不覩朝廷之儀手不掌文翰之職雖違素望實偶昌期伏限郡政不獲奔詣天闕臣無任

賀立皇太子表

代

汪彥章

顯膺寶冊升位春宮臨軒行曠古之儀見廟示承祧之重恭惟皇太子殿下分輝寶緒毓粹璿源挺天人岐嶷之資稟神聖徇齊之教當周室本支之盛獨冠百男宜漢家羽翼之成無煩四皓前星外炳游震中潛某幸列宗枝喜隆邦本河潤九里方率族以依仁日有重輪願

登歌而薦祉

賀立皇太子表

孚號揚庭元良貳極明父子君臣之懿協神祇宗社之
休恭惟皇太子殿下信厚發中寅恭承上得賢哲少成
之性符邦家長發之祥方四履以提封遂三加而冠阼
歌詠重暉之日允合天心旂登一角之螭仍昭聖祚某
久參肺腑同奉威顏傳聞徽冊之頒倍百外朝之慶

賀立皇太子表

汪彥章

顯膺徽冊昭示盛儀因歲律之更端啟春宮而正位恭
惟皇太子殿下地居嫡世望冠宗英受脤稱藩夙重維
持之執聞雞問寢日承粹穆之顏爰奉絲綸進專七
居列九重之邃班逾三恪之尊某久附餘暉欣聞孚號
崇賢肇啟莫陪漢苑之游棠棣增華願獻周詩之慶

賀皇太子進封表

曾文肅

臣某言伏覩進秦院狀報今月三日內降白麻一道皇
子天平軍節度使均國公授彰武軍節度使進封延安

郡王者百辟在庭誕揚於明命大邦維屏肇建於元良
宗社增休幅員均慶臣某中賀竊以周封姬姓之國親
如魯衛則莫與比隆漢非劉氏不王外薄胡越而皆為
列壤故信厚之風稱於麟趾而藩輔之勢安於犬牙煥
乎典常著在方冊恭惟皇帝陛下稽若成憲規恢遠圖
眷天材之夙成顧位號之非稱揆辰之吉相地以封尊
爵名城寵冠公侯之上高牙大旆榮兼將相之崇深根
固本以扶不拔之基強幹弱枝以闡無窮之祚孚號聞

於中外歡聲洽於邇遐臣久玷近班親逢盛事洵雷方
震更增赫赫之大明振鷺有儀莫預蹒蹒之率舞歡欣
踴躍倍百等倫

寶冊 冊皇太后 冊皇后 冊皇妃

賀冊皇太后表

張全真

剛辰叶吉縟禮備成王化所基式表一人之慶母儀增
重聿臻萬國之歡中賀恭以皇太后道配乾元德符帝
眷誕育聖神之質嗣承貽燕之圖屬戎馬之內侵從鑿

輿而遠適未崇位號徒想音徽恭惟皇帝陛下稟天縱之英姿輔日新之聖學丕揚大業坐致中興謂祀夏配天實本有仍之懿清宮見廟當先薄后之迎然以未聞北狩之還尚阻東朝之養惟聖人無以加孝視天下不足解憂正長樂之隆名奉慈宮之寶位冀上天之悔禍盡洗邊虞佇行殿之傳歸永安人養臣叨分屏翰密邇闕庭拭目熙朝傾心盛事堯門紀瑞增光圖史之傳漢殿稱觴阻預臣鄰之列

賀冊皇太后表

蔡君謨

竭天下之養雖恭報於厚慈盡朝廷之儀在極崇於徽
號神祇協應夷夏同歡中賀臣聞夏商以前六宮之制
邈焉而無紀姬劉以降五翟之法燦然而備存姜嫄大
妣之流音明德和思之繼盛載華禮典允屬昌辰恭惟
皇帝陛下純被九朝紹恢四聖成社稷之大計母道有
光酬天地之至仁陰靈克順爰歸功於慈訓遂推美於
瓊章家國慶安恭孝交至臣忝塵法從恪守藩封

賀皇太后遷慈福宮表

周丞相

伏以丕崇禮典尊奉母儀肇新宏宇之嚴昭揭隆名之美一人盡敬百辟傾心臣等中賀恭惟皇帝陛下德配乾坤行高今古紹堯行道甫深繼志之思如舜事親益謹承顏之養乃酌累朝之制載營長樂之規本老氏之一慈衍箕疇之五福茂揚懿範增聳羣瞻擇吉日以考成順陽春而移御茲極人倫之至尤為孝道之光臣等幸與周行願伸善頌風移四海知聖

闕

賀冊皇后表

許仲啟

剛德體元載叶離明之繼柔儀禮內式揚坤厚之承治
被六宮歡騰萬寓中賀恭惟皇帝陛下肇基王化致察
人倫仰怡重慶之顏夙資輔佐俯正長秋之位偕奉旨
甘若稽神禹之謨蓋有塗山之助廼迎穀旦俾陟椒房
臣屬與分符逖聞發冊正心誠意識聖道之造端易俗
移風必禮經之仍舊

冊皇后賀至尊表

許仲啟

仰承慈訓治形端本之餘肇正柔儀德顯儲徽之盛中
賀恭惟至尊壽皇聖帝陛下多能將聖建極惟皇舜既
察於人倫周猶基於王化陳槐宸之旒冕以授儲君總
椒掖之禕褕俾登賢婦臣尚叨假守莫獲隨班道廣二
南想問安之自內教惟五品知繼志之得人

賀冊皇后表

趙德莊

天心作配是開覩妹之祥坤德無疆式正象星之序吉
符龜筮望協人神竊以陰陽迭運則四時成日月並照

而萬物麗塗山啟而興夏姜嫄降而生周故當睿智有
臨之期必有恭儉節用之助禮斯為重教所由興恭惟
皇帝陛下再造丕基系隆景命敬脩以遠聲色克勤以
御家邦清廟精禋謹春秋之明薦東朝至養承朝夕之
慈顏不惟輔佐之求宜遴柔良之選載稽故實爰講禮
儀上遵母訓之嚴下徇官師之請章璽綬以備物儼祿
褕以展容芳懿揚於椒房高明儼乎宸極人倫既正風
既始於關雎王化攸基時自臻於麟趾臣等久蒙樂育

獲際盛明丕顯其光知四方之賴慶乃占我夢期百世
之垂休竊同遐邇之心俯極歡愉之詠

賀冊皇后表

晁之道

帝德御天化成九有坤儀正位慶洽萬邦凡預生成舉
同抃蹈中賀竊以在昔盛世惟先哲王必有貞順之賢
來會休明之運實惟天作非特人謀恭惟皇帝陛下道
格家邦教敷中外法堪輿之覆載參日月之照臨時享
罄九廟之恭聿求助祭日嚴致兩宮之奉思盡承顏宜

有柔順利正之姿以配聖神文武之德惟時淑媛式協
昌期莞簞即安已應高禩之慶宮闈蒙化早彤彤管之
風是宜稽合典章崇正位號以篤皇天之眷命以承永
世之丕休臣祇荷厚恩側聆盛典仰二儀之化育載深
螻蟻之情罄萬壽之歡呼莫預鴛鸞之列臣無任

賀冊皇后表

曾文肅

天作有德益享太平之休文定厥祥聿求內助之懿肅
使介以將命備典冊而揚庭幅員有生鼓舞相慶臣某

中賀竊以體坤元而育萬物主陰教以統六宮得闕睢之窈窕而無傷善之心躬卷耳之憂勤而有進賢之志足以靈承宗社作配聖神維持母儀選自世胄奉珪幣之聘而講希濶之典致禕翟之飾而厚正始之風綉禮煥乎非常歡聲震乎無外此蓋皇帝陛下文明天縱睿智日躋緝熙昭考之康功燕翼文母之慈訓眷圖邦媛表正宮闈警戒相成豈特輔唐虞之際盛柔嘉維則固將繼任氏之徽音臣叨備遠藩親逢嘉會祝聖人之多

子竊慕堯封頌天子之萬年敢忘虎拜屬拘官守不獲
躬詣闕庭

賀冊皇后表

曾文肅

椒房懿德寶冊降衷慶溢宮闈歡騰海宇竊以握乾垂
統必資助於坤柔治外宣風亦先成於內治母儀斯備
婦順以明稽合舊章懋隆新制恭惟皇帝陛下纘承丕
緒紹復洪圖踵遐武之重光措函生於累洽先乎民物
明王者之至公及於閨門著天下之大義維皇立配于

國承家載嗣徽音將以正心而逮下不加崇號無以示
民之有尊誕錫洪名榮褒淑德然家人利正講聞義易
之詞而君子好速載美闕睢之義自古所重於今是稱
位定壺中化成天下

賀冊皇后表

蘇子瞻

續女維莘倪天之妹事闕廟社喜溢人神中賀臣聞三
代之興皆有內助二南之化實本人倫維闕睢正始之
風具既醉太平之福民有所恃邦其永昌恭惟皇帝陛

下自誠而明惟睿作聖輯寧夷夏德既茂於治朝輔順
陰陽政兼脩於內職既膺大慶益廣至仁下逮海隅夫
婦無有愁嘆上符天造日月為之光明受祿無疆與民
同樂

賀冊皇后表

汪彥章

帝圖內治天錫柔儀前占龜筮之祥懋舉禕禕之禮中
賀伏以坤配天而乃順月受日以為明不表徽音孰宣
陰教既輔成於全盛宜登配於至尊恭惟皇帝陛下誠

金史卷之二十三
卷一中
以齊家孝惟尊禰爰正軒星之象用承長樂之顏臣久冒
明恩欣聞盛典雖外庭稱慶莫陪百辟之趨然輔郡承
流行被二南之化

賀冊貴妃表

王介甫

祲盛之禮發於宮闈歡樂之聲播於寰海中賀恭惟皇
帝陛下倣古之憲刑家以身乃資婦德之良俾貳坤儀
之政益闢睢之求淑女以無險詖私謁之心雞鳴之得
賢妃則有倣戒相成之道於以求助不專為恩生逢明

時竊觀盛事祝聖人之多子輒慕堯封思令德以式歌
豈慙周雅

譜牒

仙源類譜賀太上皇帝表

呂伯恭

清都絳闕固高視於羣生寶系璿源實仰資於太極告
成典冊垂範初雲竊以穹顯生民濬發祖宗之盛丕天
大律於昭帝系之嚴顯允熙朝肇開聖統德隆澤厚命
既即於萬年胄遠族蕃譜方登於六世戚疎區別昭穆

派分雖國論民言不至齋心服形之地然宗盟家政有
闕問安視膳之餘爰揀日以龜從咸望雲而鼇抃驩騰
濡瀆慶溢叢霄恭惟太上淵靜化元希夷物始大綱授
舜既蕩蕩以無名九族睦堯本親親而有叙光澤穆清
之邃具膺蕃衍之祥臣等幸際休辰與觀盛事中興功
業斯干戢載於父兄百世本支陳錫永觀於孫子

仙源類譜賀主上表

天發慶源衍皇支於有永國嚴大典章烈祖於無疆令

日載蠲上儀交舉竊以建邦啟土胄本出於神明扶世
導民德實參於化育厚苗裔之憑藉培厯運之靈長炎
宗肇興上通元造昭陵在御專以至仁垂光覃被於雲
初流澤涵濡於億兆厥開真主並輯曠文譜增屬籍之
華牒冠史臣之錄發揮昌緒見小宗大宗之蕃申載宏
綱示特書屢書之重源流綜貫典冊崇成由宣祖以來
咸星羅於霄極若明道而後實日靖於鴻圖振振信厚
之風皞皞太和之治銀潢滉漾玉版閱嚴千八百國之

封先乎異姓五十六族之籍展也同符懿鏢虎洪函生
闔澤恭惟陛下隆恩睦族駿惠紹基帝系綿延鑿枝葉
本根之輔皇猷渾灝思規模矩矱之遵式是不彝對於
華旦臣等參聯廷案親覩邦祺垂統聿傳陋柳芳永泰
之譜休聲遠繼賡石介慶厯之詩

賀皇子冠禮表

邵澤民

濬哲發祥克昌基本神明肖質允屬元良爰當可冠之
時大講加成之典十行降札四海傾心中賀竊以道有

廢興時隨損益飾容正體孰識上儀涓日筮賓殆成虛
禮恭惟陛下振百王之絕學納一世之大中謂化民實
本於齊家而制治莫先於善俗眷惟元子翕受天祺早
備問於寢門久聯華於國邸宜膺盛式允協聖經三加
彌尊一人有慶茲蓋伏遇皇帝陛下聖本天縱德裕日
新作民孚先敷時納治壯皇圖而增固懋帝祉以無疆
宗社垂休幅員來賀臣叨分符竹遠去軒墀丹詔載辭
暢四支而交抃明庭錯事陪百辟以何從

賀郡王冠禮表

汪應辰

吉日載涓縟儀備舉慶由禁掖歡洽寰區

中賀

臣聞聖

王察於人倫蓋將敷教男子重乎冠禮所以正身并有
三加賓存一獻彌貴成人之道適當就傅之年矧是皇
家恢崇王爵天臨秘殿俯觀展采之容星拱大庭咸覩
我冠之美燦然嘉事屬此盛時茲蓋伏遇皇帝陛下樂
育羣材型儀萬國丕合多男之祝益開同姓之封用壯
本支率循法度俾其謹始庸示有終臣未造外朝側聞

茂典安榮相若慶忭攸深臣無任

賀潁王過禮表

蔡君謨

講名典禮納配儲闈奠筭之儀告成守土之臣交忭中
賀恭惟皇帝陛下倣天合德與日齊明思隆長世之基
豫正少陽之位爰崇淑媛以儷元良龜筮協從耀青宮
之徽冊本支增茂扶炎運於無窮臣幸預通班忝臨遠
郡

賀魯國大公主出降表

王介甫

占蛇叶夢祥實發於先朝奠雁告期文甫成於外館中
賀臣聞親成經五禮之始睦媯貫六行之中善與物昌
慶惟時賴恭惟皇帝陛下齊家而國治睦族而民雍恩
隆天屬之尊禮重王姬之降謹所選尚燕及文母之慈
厚於送歸追成穆考之孝臣叨陪興運獲覩盛儀雖句
臚中絕於九賓然呼舞外均於百獸

祭祀

賀北郊禮成表代

汪彥章

講順祇之美報脩宗祖之上儀天蹕順旋海隅胥悅中
賀恭惟皇帝陛下德業淵妙精誠靜專踵行三歲之祠
並答兩儀之貺謁款郊時脩明國章地求習坎之方物
取上黃之象合於經誼邁汾雎就祭之文揆厥本原追
神考欲行之志臣幸當初學親覩稔容聞熙事之告成
與外朝而同慶

賀北郊禮成肆赦表

孫仲益

肇禋吉土涓日至之休成昭格柔祇報坤元之博厚允

膺並貺丕顯顧懷中賀竊以求象類於陰陽致明察於
天地三代受命式嚴肆赦之常兩漢卜郊乃有合祭之
禮洪惟永命駿發德音邁上聖之勃興準六經而著作
交靈心而祇順允答資生伸母事之至誠聿宗親饗舞
咸池以合晟樂飭齊輅以建太常垓陞兩城合於耦數
尊壘異制寵厥含章褒對百神因崇丘於方澤作為六
合奠嘉玉之黃琮用能風雨弗迷星緯咸叙充嘉氣於
重宇燭榮光以嚮辰神人以和祖考咸格薦祭如在畢

圭璧瘞埋之儀，於嚮來臨致丘陵，嬴介之物，陛下欽承
駿命，祇翼燕謀，蒐舉千載之闕，遺折衷諸儒之稽考，斷
自睿意，發揮稜容，臣等預覲齊明，叨陪陟降，率時昭考，
輯曠世之彌文，於赫湯孫，繼自今而作古。

賀北郊地祇示現表

孫仲益

伏覩五月某日，皇帝夏至前日，陰曠是夜，宿齋星宿明
煥，暨至行禮，空中有神物，旌旗光景，示現精意，以享對
天地之嚴恭，受命咸宜，應乾坤之昭答，清衷所嚮，瑞應

聿懷陛下講三代久闕之儀飭千載難行之典肇稱美
報以答嘉生求比象於兩儀制維新之百禮肆惇宗惟
我元祀肇舉黃琮用肅恭於爾明神躬祠方澤乃者宿
齋祇祓星緯煥明將事載陰風雲隱晦出郊洒道具瞻
零雨之濛効駕還宮始霈隨車之澤矧乃薦牲奠玉恍
若來臨飲酢受釐惕然如覩至陰肅肅氛侵出於崇丘
蘊隆蟲蟲靈光燭於區宇萬舞有奕八變告成咸秩無
文爰致羸物事地以察山林川澤之効珍先天不違雨

暘寒燠之咸若臣等參陪陟降預覲嘉祥祝史無求福
祿自至豈止膺靈祇之景貺迄用康年固宜禪梁父以
報功永言配命

賀明堂禮成表

王介甫

蒐講上儀神天底豫敷施大號夷夏交歡中賀蓋聞聖
以享帝為難孝以嚴父為至周右烈考或委政而弗專
漢祀諸神或竊禮而無實恭惟皇帝陛下道包衆甫運
會丕平巍巍成功堯之所謂大業業致孝舜之所由昌

涓選休辰肇稱嘉享百禮既至而正惟已獨萬壽攸祚而福與衆均臣久冒眷憐方嬰痲疾奉承籩豆乃獨後於臣工踰舞笙鋪竊自同於鳥獸

賀明堂禮成表

汪彥章

夙涓剛日祇見合宮誠意上孚色動房心之次靈釐下被恩均輝習之餘作民恭先惟聖時克中賀恭惟皇帝陛下靈承天地光昭祖宗具綿絕於曲臺懋建中和之極舉燔柴於吉土允符精禋之交臣幸託宗枝獲承慈

陰聞神祇之昭格與民庶以交欣

賀明堂禮成肆赦表

曾子固

昊天無聲之載人莫能名先帝罔極之恩物何以稱維
總章之定位秩宗祀之洪儀祇薦至誠用伸昭報中賀
恭惟皇帝陛下躬夙成之聖質而博古多聞經特起之
大猷而虛心廣覽振千齡之墜緒紹三代之遐蹤霈澤之
所涵濡太和之所煦嫗華夏蠻貊無一夫不獲其宜草木
蟲魚無一物不遂其性爰求祭典用告王功益諸儒之

說為不經則折衷於孔子而近世之事為非古則取法於周公罷黜異端推明極孝以尊莫大於祖故郊於吉土以配天以本莫重於親故享於合宮以配帝恩義兩得其當情文皆盡其詳撤俎云初均釐甚廣昭哉皇矣實難遇之昌期巍乎煥焉信非常之盛禮臣幸逢熙洽未奉燕閒一違前蹕之音四偶親祠之慶青雲多士皆預橋門之聽觀黃髮孤生獨歎周南之留滯

賀明堂禮成表

張全真

清蹕時巡深軫四方之多事合宮大享恪遵三歲之彝

章誠既格而神娛慶遂行而民賴

中賀

臣聞禮或隆而

或殺祀有報而有祈屬邊釁之屢生致容典之幾墜未

暇備隆於百禮特殺其文雖曰大報於三神以祈為主

爰舉紹興之近制實遵皇祐之陳謨天地合宮祖宗並

侑聖明之能述作盡洗拘孿中正以昭馨香自膺顧享

恭惟皇帝陛下生知恭儉躬履艱危菲禹食以寧神土

堯階而率下齋明盛服蒐講上儀五室九筵制既嚴於

路寢三牲八簋誠自接於高靈臣忝惟幄之舊備藩垣
之煩再逢熙旦獨遠周行餽事受釐莫替鬼神之問疏
恩作解獲沾雷雨之施

賀明堂禮成肆赦表

蘇子由

享帝尊親古今之大典推恩肆育天地之至仁舉此威
儀併在今日中賀伏惟皇帝陛下以仁御世以誠事天
乾清坤寧兵戢民阜人悅故神罔不宥物備故禮得以
成一享罔立三謁路寢誠敬之心與日兼茂寬大之澤

無物不蒙能事既脩全福自至方將享堯舜之上壽膺
成康之令名民願所同天心是若臣頃侍帷幄稍歷歲
時譴責之深坐甘沒齒江湖之遠猶冀首丘久墊泥塗
聞震雷而惕若深囚籠檻得清風而自疑

賀明堂成表

肆觀東后方躬五載之巡平秩西成不忘九室之饗人
心咸豫天眷昭回中賀恭惟皇帝陛下增光祖宗再造
區宇我將我享爰蒐講於上儀有士有林用綏懷於列

辟簫管備舉籟豆靜嘉神之格思終掃平於大憇民亦
勞止咸仰戴於中興勃然成功高出振古臣頃辭文陞
冒領守符駿奔走於下塵莫陪盛禮樂中和於遠域徒
切傾心

五百家播芳大全文粹卷一中

欽定四庫全書

五百家播芳大全文粹卷一下

宋 魏齊賢

葉 荼同輯

表

德音

賀南郊赦表

曾文肅

繼體守文既日躋於聖敬報本反始式昭示於昊穹翕

受百神之釐敷為四海之澤渙號揚於中外湛恩洽於幅員臣某

中賀

竊以洪覆難謀惟聖人為能饗齊明以

祀示天子必有尊用陶匏藁秸以稱其誠備鑿輅袞龍以致其美紫壇八觚而天位定黃鍾六變而神貺交蓋發祥隕祉所以為民故赦過宥罪與之均福矧丕承於寶祚方躬見於圜丘肇禋有成時肆大賚至於廣蠲金穀之負深恤里

闕

昭天漏泉汪洋乎其無間垂髻戴白

鼓舞乎所未聞歡聲

闕

茲蓋伏遇皇帝陛

下宅心寅畏凝命穆清率祖考以思王業之艱難惠宗
工以奉孫謀之燕翼樂休成於熙事推慶施於函生臣假守邊
藩親逢盛際莫陪多士奉璋之列實同斯民擊壤之歌

賀南郊赦表

王介甫

精意上昭神靈底豫茂恩旁暢夷夏綏和臣某

中賀臣

聞道以享帝為難禮以配天為至有秩斯祜唯四表以
歡心胡臭亶時匪九州之美味自古在昔若聖與仁厥
遭昌辰乃覩熙事恭惟皇帝陛下邁種三德敷奏九功

率籲奉璋之衆髦肇稱奠璧之新禮廟遽致孝郊血告
幽誠既格于穹昊福遂均於品庶振憂矜寡原宥耆哉
第五玉以褒封善人是富發三錢而慶賜賤者不虛天
其居歆人以呼舞臣夙叨寵獎親值休成雖無預于駿
奔實不勝于竊忭

賀南郊赦表

王禹偁

臣某言今月二十日降到赦書一道南郊禮畢大赦天
下者臣當時集軍州官吏百姓僧道宣讀施行訖嚴父

配天王者之達孝青災肆赦有國之大猷凡在羣生罔
不同慶臣聞有虞尚乎德祖顓頊而宗堯周人重其先
禘帝嚳而郊稷沿革之文則異祠祀之義斯同率由舊
章茲曰大事雖天子必有尊也非聖人孰能行之伏惟
尊號皇帝陛下司牧黎元敦崇孝治言有父也宣祖昭
武皇帝積德而累功言有兄也太祖神德皇帝開基而
創業繼志惟謹守文則難化成而日用不知寅畏而夕
惕若厲故得昆蟲咸遂戎狄允懷文物聲明損益乎三

代道德仁義寢染乎萬民有是聖功推功於天地有是
聖德遜德於祖宗乃備嚴禋聿伸大報禮樂具舉豈三
年之不為玉帛載馳見四海之助祭列聖至上帝格思
錫鴻休於無疆明大孝之不匱禮成而退天且不違自
非吉蠲之誠達於上下孝弟之至通於神明孰能若斯
其盛歟由是因純嘏之休覃雷雨之澤謂萬方有罪於
是乎釋縲紲之人謂百姓不足於是乎逸逋逃之賦炤
燭幽壤滌蕩瑕疵順天推恩與物更始詩不云乎一人

有慶經不云乎萬國歡心自可追三王而比崇非止黜
五霸而不用者矣臣出官內署承乏專城既不得陪冠
劍之班行俎豆之事舞拊於黃道登降於紫壇又不得
湧非烟之詞濡甘露之筆藻繪於玉冊發揮於皇謀亦
臣之不幸也然而當求治之朝居分憂之任得不道揚
兌澤訓戒齊民瘳其瘡痍沒入骨髓亦臣之大幸也伏
限鄙事不獲奔詣闕庭臣無任

賀明堂赦表

孫仲益

禮成宗祀修累聖之彌文恩錫庶邦廣穹昊之景福一
洗寰區之昔舉霑曠蕩之恩恭惟皇帝陛下祇燕孫謀
紹隆明德雖四方之虞求靖而三歲之典弗違上以對
越在天之靈下以浹洽好生之德豈止欲囹圄空虛而
謹罰庶幾俾盜賊向化而革心臣祇率吏民布宣德意
想緝儀於路寢莫預駿奔均慶賚於海隅共欣渙汗

賀明堂赦表

蘇子瞻

宗祀告成修累朝之盛典端門肆眚答萬宇之歡心凡

有識知舉增并躍中賀竊謂祖宗恩信之所被譬如天
地寒暑之不差將推作解之仁必在當郊之歲恭惟皇
帝陛下憲章六聖左右三靈上帝眷而風雨時壬人去
而蠻夷服講明大禮對越昊天懷柔百神嚮用五福大
河修復奏軌道於東流藩邸顧懷錫鴻名於西府臣備
員法從待罪守臣想聞路寢之鼓鐘曾叨奉引嘉與海
隅之草木同被恩私

賀明堂赦表

蘇子瞻

嚴配禮成民皆知孝好生德洽天下歸仁凡蒙一洗之
恩舉有惟新之喜中賀伏以功存廟社而辭其禮德及
草木而諱其名此聖人之所難幸微生之親見恭惟太
皇太后陛下勲高任如道配唐虞顧惟致治於和平孰
不歸心於保佑合宮均福畢修累聖之文會慶告成不
居先后之位臣職叨禁從身遠闕庭既欣渙汗之私溥
霑動植更喜謙光之美獨冠古今

賀明堂赦表

曾子固

奉承聖考升配上天秩盛禮於法宮推大恩於率土
賀伏以皇帝陛下有聰明好古之質有恭儉愛人之誠
兢畏萬幾仔肩一德燭柴展報既昭告於元功嚴父致
隆又推明於極孝越成釐事均布鴻休草木昆蟲皆令
受賜華夏蠻貊莫不歸仁臣心繫北辰身縻東土永懷
故事難求汶上之圖歸遠清塵方嘆周南之滯

賀登極肆赦表

許仲啟

歷數在躬既親承於舜嬪雷雨作解初廣被於周封仰

止重熙集茲大順中賀恭惟皇帝陛下仁魚天覆量極

海涵奉鬯東闈俾羣黎陰受其賜凝旒南陛將萬彙各
得其宜禮崇揖遜之餘澤茂龐鴻之後削三章於筆下
不但刪煩運八柄於環中莫先馭幸臣撫摩攸寄曠蕩
是逢壽域四開欲對吏民而鼓舞化基一立諒移風俗
之權輿

改元

賀改元表

趙德莊

履端於始分介壽於兩宮謂一為元用同文於四表詔

音誕布品物均歡

中賀

竊以天作高山億萬年而不拔

龍飛白水二百載以中興啟佑昌辰若稽成憲兼舉鴻
名之懿一標鳳紀之新歲有虞上日之儀王春無外符
貞觀元正之義聖孝彌光恭惟皇帝陛下清明在躬勉
強行道南鄉三邈歷數自歸五日一朝德教如響體乾
行而利見觀泰象以財成爰因卜年明示初政規模宏
遠聳夷夏之前聞光訓答揚極子孫之茂烈臣濫宣寬

大親際休明告以昭時竊仰三朝之盛授茲神策願占
九會之期

賀改元表

李成季

神休沓至昭示聖時歲號更新欽承天意布宣萬國鼓舞
羣情中賀恭惟皇帝陛下德咸通三靈眷佑諸福之
應緣類而來明昭下土則神光燭天澤潤生民則甘露
如雨欲付以享邦之慶又申之受命之符皆前世所罕
聞不踰時而來上載之簡冊播諸聲詩猶未足著無窮

之傳復何以表非常之貺方將詔世宜重紀元太史編
年無愧祖宗之美明堂頒歷永同天地之期

賀郊祀改元肆赦表

行會通之禮肇三歲之明裡下寬大之書新一元之美
號熙事允成於上日湛恩誕布於中州竊以祀天地者
國家之盛儀法祖宗者帝王之能事仰惟上聖順考神
謨肇祀改元遵藝祖乾德之制卜郊遷日法太宗至道
之規前烈用光孫謀惟永恭惟皇帝陛下秉國御錄體

道承乾歷數在躬當圜丘之美報蠻夷猾夏偶外闔之
戒嚴申誨日以致虔俄動天而昭監倒戈不用和戎狄
以正諸華啟蟄而郊執珪幣以見上帝夕烽滅照柴燎
告升春澤發生震雷作解與生靈而更始改正朔以承
天保合太和永受厥福臣職分偏壘身遠外朝啟運千
齡仰慶乾元之用九舉觴萬壽阻陪嵩嶽之呼三

賀正 賀冬 賀月旦

賀元會表

王介甫

漢儀高會方登四海之圖周歷俯頌乃獻百官之象

中

賀恭惟皇帝陛下含德淵懿撫辰休嘉乘姑射之雲龍
所更者化存胥教於蓬艾各遂其生運與日升道侔乾
始臣尚依粉社獨隔楓宸緬瞻朝著之班竊慕封人之
祝

賀元會表

秦少游

十二月為正前既稽於夏道二千石上壽仍參承於漢
儀盛旦載途彝章具舉

中賀

伏惟皇帝陛下財成天地

參並神明命羲和之二官謹春秋之五始調和元氣撫御中區肆屬春王之朝肇修元會之禮雞人呼旦庭燎有光外則虎賁羽林嚴宿衛之列內則謁者御史肅班行之容漏未盡而車輅陳蹕既鳴而鼓鐘作應龍高舉雲氣畢從北極上臨星宿咸拱受四海之圖籍拜萬國之衣冠歲月日時於焉先正聲明文物粲爾可觀邁康王鄴宮之朝掩高帝長樂之事藹頌聲而並作鬱協氣以橫流臣比遠天光遽更年籥職拘藩國莫瞻龍袞之

升心折宸居但想獸樽之列

賀元會表

太昊司春王者大乎居正天子當寧聖人所以履端粲
盛典而濶希沸羣心而踴躍中賀恭惟皇帝陛下王功
歲省帝德日新考圖籍於三朝來玉帛於萬國家宰獻
嘉禾之瑞史奏豐年鄉老登賢能之書時當大比天人
和會福祿繁多臣竦聽上儀冒居邇列路朝千里莫瞻
庭燎之光韶樂九成驟起鈞天之夢

賀元會表

嗣歲更端寶曆再新於大號衆星拱極絳袍新御於法
宮闕象魏以頒常履春朝而謹始誕敷成命昭示多方
臣某中賀伏以行夏正而奉三微被舜袵而朝百辟具
典禮則豈特甘泉之上計施德澤則非徒宣室之受釐
陸戰峙而天威嚴簫韶張而樂府備九賓就列肅冠珮
而集鵷鸞五輅在庭建旂常而載日月覈名實則收八
方之圖籍懷遠邇則納四海之貢珍是為一元熙洽之

辰允屬千載亨嘉之會黼黻皇業彌綸舊章恭惟皇帝
陛下若古大猷躋時百揆運德乎聖神文武之上儲精
乎蠅蝸蝓獲之中勤勞萬幾經理百度講侵容之希濶
增盛旦之光華臣年迫桑榆跡羣麋鹿久嬰謫籍寢遠
清光附鳳攀龍莫與稱觴於北面擊壤鼓腹唯祈介壽
於南山頌蹈歡呼倍萬夷等

賀元會表

夏正三朝肇啟孟陬之紀禹會萬國爰開太紫之庭熙

事告成含靈咸豫

中賀

竊以魯史之大一統蓋謹天端

周官之別八賓莫先春見故自昔迂衡之際有朝元來
會之儀謂環以星辰拱宸居而若極則遠夫庶陛尊人主
以如堂於赫昌期載隆懿典恭惟皇帝陛下光昭嗣服丕
冒寰區儲神護護之間既歸於治稽古禮文之事方采
其宜適因頒歷之初肆舉受圖之舊詢朝政以恤民隱
究皇儀而展帝容綿蕞遽陳哂前聞於長樂獸尊爰設
備遺式於咸寧鳳來應於九成山自稱於萬歲臣濫當

上計遐阻奉觴不意微生見藝祖乾元之德但慚能賦
乏東京平子之辭

賀元會表

汪彥章

二儀交泰躬寶曆以履新萬寓駿奔御端朝而受祉恭
惟皇帝陛下德惟天合聖與日躋薄海內外而悲主臣
觀時會通而行典禮乃承千載之統大備九賓之儀列
侍東曹猶想儒冠之表著邈居南紀願同江水之朝宗

賀元會表

石敏若

春入東郊協四方之正朔星環北斗拜萬國之衣冠盛
禮傳聞普天交慶

中賀

恭惟皇帝陛下繼禹之服行堯

之道陰陽和而寒暑平法度彰而禮樂著式當穀旦寅
舉上儀燎設廣庭香飄合殿羽林神策高瞻帝座之尊
瀚海陰山同上聖人之壽臣恪居支郡阻造路朝班歷
授民已應飛灰之葭管稱觴望闕徒傾向日之葵心

賀元會表

接千歲之統方啟昌期盛九賓之儀大朝獻歲會簪纓

於率土瞻旒宸於中天中賀恭惟皇帝陛下道冠羣倫
澤流億世天庥滋至如受命之惟新治具畢張見修文
之益備某久塵法從叨領真祠聞盛典之復行與羣情
而交慶受四海之籍遙企乎垂衣奉萬年之觴莫陪於
舞手

賀元會表

一元紀歲既遠取於夏時九陛傳觴亦兼循於漢制肆
均羨福廣被多方中賀恭惟皇帝陛下寶運中興上儀

再舉千官盡肅益知天子之尊萬物咸新共覩聖人之
作臣昔陪近侍久去周行疾病滯留阻執大庭之贄夢
魂髣髴如聞長樂之鐘

賀正表

趙德莊

帝出乎震載更堯歷之新斗合於寅允協夏正之建慶
叢上日祥應昌期中賀恭惟皇帝陛下道妙彌綸誠贊
化育璇璣密運天地節而四時成玉燭均調陰陽和而
萬物得干戈載戢禮樂備興皇極錫民方順發生之令

大鈞播物咸歸仁壽之途臣職在守符神馳魏闕接千
歲之統親逢有道之長奉九行之觴遙慶太平之福

賀正表

臣某言三陽交泰正元會於路朝萬國傾心觀法則於
象魏臣某中賀恭惟皇帝陛下天臨四海子惠萬民應
運撫期方御無疆之歷對時育物宜膺滋至之休臣假
守邊陲遙瞻帝闕上千萬壽阻稱虞殿之觴同億兆人
遠效華封之祝臣無任

賀正表

璿政更端會三元而啟祚王春正始開萬彙以咸新臣

某

中賀

恭惟皇帝陛下舜德誕敷文謨丕顯永御無疆

之厯光膺至治之休與物為春當青陽而出令順帝之
則處黃屋以非心嗣歲並興羣情交泰臣濫居邊閫權
守郡符獻頌稱觴雖阻陪於漢殿望雲就日惟欣戴於
堯天臣無任

賀正表

氣肇青陽誕布始和之令春回丹禁聿修首祚之儀慶
集三元歡騰萬宇恭惟皇帝陛下凝神昭曠受命溥將
井鉞參旗戢師干而弗用箕風畢雨霑解澤以旁流何
福不除有室大競臣等獲叨慶賴久冒慈憐駕綴充庭
共仰瞻於北極椒觴薦壽敢虔頌於南山

賀冬表

呂伯恭

羲馭迎長厯既傳於大舜魯臺書瑞雲咸望於帝堯凡
厥含生胥為善頌恭惟太上皇帝妙參三極高蹈百王

游物之初坐毓滋萌之彙御氣之辨默符亨長之陽順
履休辰備膺純嘏臣等備偕羣品仰政太清本本元元
起數載符於一復父父子子並明永協於兩離臣無任

賀冬表

張欽夫

律應中聲候迎長景宜人神之贊善輔宗祏以儲休中
賀恭惟皇帝陛下重堯之華行禹之智顓俊以尊上帝
斂福而錫庶民周典是遵待彼陰陽之定義文默契見夫
天地之心臣叨奉藩條阻陪班綴天子萬壽敢忘歸美

之誠王者三微願廣好生之德

賀冬表

王介甫

庶彙潛萌上儀亞歲室告氣行之協臺占瑞至之嘉伏
惟皇帝陛下考敦復於大中籲朋來之衆俊剛健之德
與陽皆亨壽昌之期如日方永臣叨榮近列櫻疾殊方
鳧趨獨後於在廷雀躍實深於存闕

賀冬表

氣復黃宮茂對物資之始晷移北陸寅賓日至之長

中

賀伏惟皇帝陛下道與時行化猶天運嗣無疆而履位
建有極以宜民甫臨陽長之期大襲福綏之慶臣思容
居里病阻造庭雖薦壽以無階顧馳心而曷既

賀冬表

代

晁无咎

經謹周正厯推子朔景短窮而長至卦剝盡而復來慶
始宮闈歡均海縣中賀恭惟皇帝陛下中和致理仁孝
承祧化本時行元統天而不息德方日起明出地以無
疆觀雲導民物之康齋居待陰陽之定履端於始求福

不回臣親托本支生陶惠愛傾一心而猶藿祝萬壽以
如山

賀冬表

汪彥章

日官晷日於朝告陽來復天子承天之意與物咸亨爰
修亞歲之儀懋履對時之慶中賀恭惟皇帝陛下誠參

化育幽贊神明朔復朔而謹治歷之端刑無刑而體好
生之德推步舒長之景數得周正逍遙供奉之班心存

魏闕

賀冬表

代

晁无咎

易謹閉關蓋待陰陽之定傳先書物以知天地之祥惟
昔宅尊與人同慶中賀恭惟皇帝陛下剛柔體道動靜
得時齋戒自修將神明其至德財成與合用左右於斯
民薰陶太和積累至治臣本支同體茅土分封擬續周
詩申百福而干祿敢忘漢禮稱萬壽而獻觴

賀冬表

汪彥章

三微肇序方迎舜日之長萬類傾心同望堯雲之遠恭

惟皇帝陛下功齊列聖道冒羣倫溫柔寬裕而足有容
夙諧民願進退存亡而不失正允合天心理極屯難時
當亨復久違溫清徒軫夙宵聽嶰谷之新筍於占則吉
要襄城之法駕不日而旋

賀冬表

候始三微氣萌萬彙謹觀臺之占瑞亞獻歲以陳儀臣
某中賀恭惟皇帝陛下祗適燕謀靈承休運先一陽而
獨復斂諸福以朋來臣屬此養痾恭然在遠傾心舜日

金少曰八卷二下
卷一下
欣寶景之踐長仰首堯天祝壽期而等久臣無任

賀冬表

王介甫

萬寶潛萌應黃鍾之協氣百工胥慶亞正歲之上儀

中

賀
恭惟皇帝陛下體御至神詡揚獨智武烈丕承乎前
載堯明光被乎多方茂對斯時備膺諸福臣比緣衰疾
獨遠清光雖存闕之不忘尚造庭之未獲臣無任

賀冬表

汪彥章

日官推三統之元茲為妙始王者會八能之士以下豐

稷惟亞歲之佳辰啟後天之遐福恭惟皇帝陛下道隆
治古澤在生民雖孔子之居九夷寢忘其陋效黃帝而
從七聖未免於迷既陽復於黃宮宜慶回於丹宸違顏
滋久結戀殊深上漢殿萬年之觴莫諧願御來穆王千
里之駿惟祝遄歸

賀冬表

伏以葭莩潛動氣騰緹室之和芸荔已萌陽應黃宮之
候雲容呈瑞日馭迎長恭惟皇帝陛下精一執中時幾

勅命不役耳目陶萬寶於化鈞載戢干戈納含生於壽域對初陽之令節歲亞歲之上儀萬福攸同四方來賀臣叨榮端揆率屬周行春八千而秋八千共祝延洪之奠踴三百而躍三百徒深抃蹈之誠

賀冬表

七政上齊協璣衡於景至九儀下辨旅圭璧於陽生休氣函蒙稜容飭備恭惟皇帝陛下道原皇極化浹泰和天地之心玩羲爻而來復日月所照觀周正之徧頌同

軌同文時萬時億臣等迹汙班綴目睇陞廉南面而朝
羣臣雖亞歲彛章之舊北鄉而壽慈極實熙朝慶典之

新

賀正旦表

中山內翰

臣某言伏以蒼祇授職寶冊更端斗杓建而環壤皆春
庭燎明而叙朝允肅中賀伏惟尊號皇帝陛下體元居

正藏用顯仁推至信以合時保太和而庇俗中機鑿遠
奉靈德以彌寅秘祉來同伴健行而有裕臣以叨分外

祿限守列藩莫陪星拱以稱觴徒效嵩呼而攄頌祇歡
悚戀倍萬殊情臣無任

賀二月旦表

臣某言伏以中和紀朔初吉協辰擊幽鼓以宣揚奮豫
雷而振蟄中賀伏惟尊號皇帝陛下燭明庶政慈衍羣
生時祀迪於齋莊神顧洽於優裕介其豐祉允致丕寧
而臣遵職攸拘違顏茲邈莫接鸞鷲之序但傾駑蹇之
誠祇仰宸闈精爽飛越臣無任

賀三月旦表

臣某言伏以靈氣融春庶萌達壤浮棗將修於元楔拂
桐適應於嘉時中賀伏惟尊號皇帝陛下躬攬萬幾咸
宣九德奉上昊而致絜居右个以敷和總集丕祥允諧
至治臣以恪分事任莫厠班朝徒歌蕩蕩之風靡罄縷
縷之懇臣無任

賀四月旦表

臣某言伏以炎德司方正陽命朔風薰兮而發詠麥蔚

若以擢芒

中賀

伏惟尊號皇帝陛下盛大履尊盈成固

業體高明而柔克迪淵默以雷聲率邁元猷丕臻殊貺

保天襟而允穆洽聖治以永寧而臣尸職連城馳心曉

闕莫側影纓之列徒深忭岳之誠逖頌亨嘉倍萬悰款

臣無任

賀五月旦表

臣某言伏以中暑宣和重離協盛雨濯枝而咸霈糧棲

畝以斯豐

中賀

伏惟尊號皇帝陛下執粹研幾顯仁熙

志撫萬邦而有謚勅五典以彌惇履茲化育之辰允契
高明之德臣以違天咫尺稟聖教條洽九序以同歌
趨三階而罔獲荷恩寢久存戀增勞臣無任

賀六月旦表

臣某言伏以函鍾命律溽暑協時頒冰式考於周儀沈
李聿彰於魏典中賀伏惟尊號皇帝陛下體元稽
古垂正御邦敷五教而在寬庇羣生而咸叙允懷靈顧
克迪鴻祥臣欵遠宸闡適叨藩守辨色莫陪於星拱傾

金史卷之二十一
卷一下
心徒切於蒿呼臣無任

賀七月旦表

臣某言伏以少昊肇秋亢陽舉令登周末而告稔烹幽

菽以薦嘉

中賀

伏惟尊號皇帝陛下端宸宅中握機撫衆廓

帝絃而可大錫民極以保和天祉益新聖慶斯茂臣以
忝尸郡祿阻奉朝威祝彌億以惟虔望長安而伊邈忭
詠延企實萬常鈞臣無任

賀八月旦表

臣某言伏以星杓建酉雲曲流商銅壺之晝漏平分華
表之夕音互警中賀伏惟尊號皇帝陛下淵默為聖清
明在躬教以絜靜體元德以儉慈庇俗五紀協用克彰
屢省之勤百穀將登允迪順成之祉彌膺丕貺誕保鴻
名臣以恪守藩條緬瞻魏觀但結存心之戀莫陪訓則
之規臣無任

賀九月旦表

臣某言伏以金祇協序霜隼勝威休工爰考於戴經省

斂聿符於夏諺中賀伏惟尊號皇帝陛下德昭可久功
著咸亨總步驟於前猷洞布微於至要尚敦沖挹推奉
靈元聿懷天祉之多式庇人倫之衆永惟孚祐率迪熙
康臣以祇守郡條邈違陸戟西序莫陪於就列中山徒
切於存心臣無任

賀十月旦表

臣某言伏以神頊執權郊祇順祀鄙正舉勞農之典風
人詠納稼之期中賀伏惟尊號皇帝陛下統御萬邦熙

明百志奉天時而允若荷靈祉以來同高居靜淵慈保
黔庶省歲之功允茂體乾之德彌昭臣以幸易藩封密
鄰圭甸望鬱葱之佳氣恭認堯茨陪鏘濟之清班尚違
漢城疲駕感戀夙夕以之臣無任

賀十一月旦表

臣某言伏以星昴正時律鍾推本雲儷霄而同色桂冒
霰以含榮中賀伏惟尊號皇帝陛下端宸凝神處機觀
運禮樂崇其醲化天地參其茂功介慶祉以惟新保亨

基而彌大令辰攸履純貺允歸臣以濫假圭符邈瞻局
禁祇守作孚之式阻趨辨色之朝就戀誠深倍萬常品臣無任

賀十二月旦表

伏以水行攸序月紀斯周奉厲節以順攷介寵禧而修
蜡中賀伏惟尊號皇帝陛下撫清寧之運播鴻鬯之猷恭

已御邦對時育物化敦九有薄無外以安瀾神輸百成
祚惟明而合吉臣以恪修民職邈企聖威阻趨建禮之
朝徒結子牟之戀臣無任

賀正月旦表

宋子京

璿政更端蒼塗獻祉維新萬物是號三朝中賀恭惟皇
帝陛下統揖天元奮熙民極洪休衍而俾熾庶品動而
斯和光啟華正交修令典祚均時億澤與春游臣恪領左
符方遙外屏想虎蹲之正挹隔鳧藻之趨翔

賀二月旦表

日履圜鍾月躔營室祀謹開冰之潔禮修合扇之常中
賀恭惟皇帝陛下總一權綱混齊聲教撫五辰之善應

迎萬寶之華旗聿履載陽交孚億祉臣適司郡政雙阻
朝聯蓬翔鷺以無從擁締魚而增惕

賀三月旦表

協氣熙蒸幽萌普達歌惠風於雩館潔元禊於陽濱中
賀恭惟皇帝陛下建治民中持盈天則包九圍而無外
御六辨以載和啟朔茲臨儲休云億臣適嬰州務寢阻
朝聯束華帶之檐如企端闈而勤止

賀四月旦表

月紀正陽律推仲呂琴軫歌風之序天薙薦寢之常中
賀恭惟皇帝陛下昭德九圍垂精衆甫道迎協氣之廣
物遂崇丘之宜告朔普頒圓靈順嚮臣恪司守組延注
朝旂邈觚鳳之雙軒羨烏鳧之歸翥

賀五月旦表

炎夏云中晏陰茲定里俗紀浴蘭之候禮經標聚藥之
辰中賀恭惟皇帝陛下總道研幾登皇接統播長羸於
萬寶戒翕習之千祥吉朔順頒泰和交嚮臣恪司虎竹

遠鑿閨瞻昕仗以無堦望郁雲而增企

賀六月旦表

畢雨時行溫風普至今紀為螢之候時標振羽之宜

中

賀恭惟皇帝陛下躡濩凝神煥巍布治維泰山而定業
括輿地以貢珍順改朔辰叢昭秘貺臣限司郡印胥隔
朝綏空存燦闕之心莫綴有規之序

賀七月旦表

風御回涼火躡流景漢祀封牲而迪薦幽風鳴鷗以告

農中賀恭惟皇帝陛下握紀建中察璿布度擁上靈之

丕佑俾西秩之善成告朔照臨素商胥應臣違顏嚴所
假守近藩歸國未期影纓攸阻

賀八月旦表

月協仲商天澄西顛謹鄉儼而達氣洒丘麥以趨農中

賀恭惟皇帝陛下濬哲在躬顛印布度貫三儀而念用
總六氣以財成昭屆朔辰翕宇鴻祉臣恪司州戟負阻
朝途身同太史之留目儵長安之遠

賀九月旦表

霜清暎日風勁霄旻凝鍾韻於豐阿祭菊英於潭溪
賀恭惟皇帝陛下崇隆下武仁濟羣元總百度以建功
擁萬祥而成歲朔辰順履靈佑丕昭臣祇佩印章夏遙
城齒傾憶傳雞之唱莫瞻棲鳳之華

賀閏九月旦表

日委餘躔月分重琯謹玉扉之盛禮積霜昊之蕭辰
賀恭惟皇帝陛下執契御邦奉宸布度保合三儀之要

秩成萬寶之常薦朔普頒繁祺叢貺臣遠嬰州務久隔
朝猷擁孤想於半符羨歸飛之兩鳥

賀十月旦表

上冬協序良月標祥肅天寓以藏虹戒民間以瑾戶中

賀恭惟皇帝陛下述敷星象裁輔天宜極羣彙於崇丘
祭大時於和燭朔辰順告蕃昨昭膺臣恪守侯圻遜懷
朝佇怡然心企恨不肉飛

賀十一月旦表

天正紀月昴陸司辰流愛晷於圭躔集祥靈於縞頃中
賀恭惟皇帝陛下至仁茂育昭德敷聞綏萬寶之屢豐
納羣元之俾壽坐堂更朔罄寓叢禧一阻班聯五遷盈
朏恪守外符之謹長懷左城之華

賀十二月旦表

星舍回躔月音窮琯五種班而載耨七駟駕而于政中
賀恭惟皇帝陛下乘正膺圖建猷順古漸車文而薄海
擁瑞福以如山告朔誕頒迎年永嚮臣近違塗祀遐奉

紉書造雖羽以無堦僚雲表而增企

駕幸

賀車駕幸秘書省表

呂伯恭

東觀書林久徯漢儀之覩西崑冊府載瞻周馭之臨嗣

三紀之閔摹軼百王之盛節

中賀

竊以斯文崇替與世

降升自我祖宗嚴載籍萃藏之地於時典冊踵乘輿游

幸之書從容箴誨之求廣大峻良之聚矣圖再造華省

一新爰親御於後文用仰繩於前武重明善繼太極丕

承乙夜牘陳念初載網羅之不易昕朝班入思中興儲
養之有原迺臨三館髦彥之躔爰展列聖圖書之奧帝
暉下矚光榮河溫洛之藏天藻昭垂跨過沛橫汾之詠
湛露示醇醲之惠承雲宣純繹之音一日萬幾曾靡齋
居之暇九流七略獨煩清蹕之留蓋以恢稽古尚德之
風夫豈為飾治樂成之舉聲名布濩慶賜汪洋恭惟皇
帝陛下秩序邦經裁成王度多聞將求建事既惠顧於
簡編大亨所以養賢復均盼於肴醴羣志興起雅道流

行臣等服在具僚身逢昌會獻從臣之頌敢揚厲於鴻
休近天子之光請具宣於德意臣無任

賀車駕幸太學表

蘇子瞻

輦回原廟既崇廣孝之風帷次儒宮復示右文之化禮
行一日風動四方中賀臣聞五學之臨三代所共蓋天

子不敢自聖而盛德必有達尊在漢永平始舉是禮雖
臨雍拜老有先王之規而正坐自講非人主之事豈如
允哲退托不能奠爵伏興意默通於先聖橫經問難言

各盡於諸儒恭惟皇帝陛下文武憲邦聰明齊聖大度
同符於藝祖至仁追配於昭陵爰舉舊章以興盛節臣
早塵法從久侍經幃永矣馳誠想聞合語於東序斐然
作頌行觀獻馘於西戎

賀車駕幸太學表

蘇子瞻

濟濟多士靈承上帝之休雍雍在宮服膺文母之教風
傳海宇慶溢臣工中賀臣聞學校太平之文而以得士
為實經術致治之具而以愛民為心心既立而具乃行

實先充而文斯應永惟坤載之厚輔成天縱之能惟使
文子文孫莫不仁故於先聖先師無所愧恭惟太皇太
后陛下憂深祖構德燕孫謀黃裳之文斧藻萬物青衿
之政長育羣材豈惟鼓舞於士夫實亦光華於史冊臣
冒榮滋久被遇最深外告成功行喜鴉音之革中修潛
德孰知麟趾之風臣無任

賀車駕幸太學表

石敏若

三千壁水放自國中萬里蜺旌來從天上升階奠爵而

蒐舉墜典橫經賜坐以光輝諸生自然草靡而風從孰
不鳶飛而魚躍中賀竊以增員廣舍自漢而下莫如唐
養老之言由堯以是傳之舜削畫餅虛名之科舉患羸
糧往學之衣冠在太平時皆盛德事前古蓋嘗有意卒
無成功元豐未暇盡行留待今日恭惟皇帝陛下與天
無極如日之升謂命鄉論秀告於王而化民成俗必由
學夙嚴保衛祇謁儒宮有司洒道以清塵觀者駢肩而
累足雲開東幄建黃屋以親臨鷺集西雖望翠華而再

拜士氣鼓翮歡聲湧泉豈特夏曰校而周曰庠天其文
德將使戎在西而狄在北懷我好音臣目覩天書心存
魏闕起太史滯留之嘆嘉會難逢獻周王壽考之詩道
人未出



五百家播芳大全文粹卷一下